

陶

山

詩

錄

陶山詩錄卷十五

善化 唐仲冕 六枳

連楸軒集

甲戌正月

次韻長兄詠雪

春風纔到喜恩頒
澤在農田積在山
恰補天穿星石密
爲添梅瘦玉英環
冰衾雙蹠寒宜護
琪樹三花近可攀
興滿香甌勞寄讀
勝於拊背接歡顏

連楸軒自題四首

金陵山館購餘十年庭有木瓜樹雙幹聯枝花似海棠而香落實甚夥百年前物也今春寓居頗久始見

其連理之奇因以名軒而咏之

楸木生連理庚庚映畫堂拂雲雙幹合閱世百年長葉
占當軒綠花分隔院香秋來垂實滿先後一齊黃

奇樹今初見依棲幾歲寒懷恩瓊莫報嘗味橘仍酸宦
類駢枝贅衰憐脚氣寬宣州誇百益輸爾得天完

扶疎逢廡館交讓憶鄉園百果宗霜品三花挂露痕苞
直行有禮桃李下無言孤負平安竹空山早閉門

少時居湘

西山中生連理竹

先大

夫命賦詩今宅久易主矣

買策思償樹移官已及瓜柯交窗四面蓬轉路三义

時因

遷秩入都爲對懸星影深慚貫月查老懷賦榮木根抵托烟

霞

舟發金陵

牡丹正開鰭欲上江東風物恣清賞無端忽被吏牒催
携裝便打白門槳白門門外江水長上由沅澧下淮揚
不溯熊湘還故里反從袁浦逐名場名場浪跡幾二紀
州縣勞人亦知止閒居纔喜謝沈疴壯懷猶欲報知己
多嬾還山老友朋頗憐牽袂諸孫子人生出處亦何常
每以欣厭爲行藏出門解纜心已悔垂老何堪長宦海
萬斛一帆今更開何期破浪問蓬萊笑指石尤風乍起
却送莫愁艇子來

揚州食鱖魚二首

若過邗江去江鱖不可求一生家食少多半北烹愁每
憶臨湘釣思迴上道騶老饒逢漑金好繫綠揚州
閩海饒香荔官疑爲口遷豈因懸指味坐失及時鮮夜
月寒生筋春潮淡入筵行厨趁櫻筍沽酒畫橋邊

淮南舟中戲次賞雨茅屋集中雙字二十四韻足
成三十二韻爲憂讒畏譏者寄慨

柳窺青眼隻鳥逐白頭雙春意能涵海秋波欲泛江牽
蘿曾補屋織絲未纏缸大地紅羊劫長淮淥水腔霧濃
輕墮髻雲軟暗翹躩獨使趨還退新憐喜更懽鉤簾原

出馭感悅豈驚危密坐生疑網幽談起慢幃容顏消向
月伴侶險於瀧源藉牟尼燭光依北斗杠折蔓猶在手
垂筋已盈匳卜問探私姬齋通入夢嬌兩當緘荳蔻三
沐佩蘭茝君不遺葑菲兒宜侍几窗我心非席卷彼怒
以矛撻宮調么相叶青衣綠匪厖閨偷睂嫵畫庭倩目
成眈小技麻姑猶能言鸚鵡呢朝霞函鏡啓夜雪漏鐘
撞但得陳倉度都令趙幟降沱潛分巨浸邾莒附名邦
酌酒尊前舞吟詩背後跢荷花亭畔扇菴葉渡頭艣拭
汗巾無膩褰帷睫尚眈步搖情叩叩條脫韻琤琤刺繡
鍼神擅摹書筆力扛烟微添篆鼎星小剔銀釭爲奉清

塵惡還因昵語惹寄聲懷柘館凝睇倚棹饒味久嘗蘂
白盟應指石砭曲防譏複壁垂老笑綠檀本異鴟夷舸
中流好繫橈

弔張船山太守

斯才不世出醉筆列仙儔古柏含春氣長江蕩濁流童
鳥音竟杳老鶴志難驕幾日楓橋泊披圖墨瀋畱

渡河

黃河之水何清漣云自洪湖注大川去年河溢睢州口
橫流直以淮爲淵黃金可成河可塞似言塞河如鍊仙
金丹誠非理可致宣防終賴力能專前年五工同時舉

人言李樓宜暫延制府成謀稟

睿斷尅期集事素不愆墊隘早營平野屋鉤稽兼省水
衡錢令時泛濫及盱泗汙泥入湖湖可填流庸遍野

恩加卹使相蠲糜計安全河隄使者無少懈

九重宵旰哀顛連或言芻薪費鳩庀工需水落霜降前
我愚不識治河策但見澄波異昔年迴瀾順軌豈無術
精誠能破金石堅自慙職小才又薄登車攬轡心茫然

車行湖路

行澤者欲杼行山者欲俾今之車制畏泥濘不畏犖确
行山邱北轅若逢夏秋月往往驅走岱之陬雖然入岩

或致覆猶勝陷淖難掀輶此行徑趨下邳道亂次以濟
泃河頭微山湖水濟轉漕以水爲櫃深且周今年湖淺
成尺澤縱有積雨無沮湫主者蓄洩少綢繆溝澮何以
通糧舟

朝廷震怒寘之理疏泉導畎難爲籌蘭陵谷陰平郵行
人掉鞅聽鳴騶豈知涸轍愁殺監河侯

楚蘭陵令荀卿墓

戰國四公子頗喜春申君三千珠履客獨得一賢人惜
哉邑令權不尊惜哉荀子道未醇使爲令尹與司馬三
戶豈止擯強秦著書四萬明王道李斯一傳失其真如

何非駁及思孟駢臂豈異聖人門官於其地家其地或有遺愛畱斯民千秋而下封樹存牧祺成相非空文

過東平州

落月隔重林寒帷曉色侵薄寒搖短夢平野入遙岑澤

被遺黎遠

乾隆年東平大水實惠其贈東平牧詩云承

先大夫奉檄檢災民沾帝曰咨分命

汝拔民於水力迴天

雲依宰樹深

距陶山百里

谿堂何處是懷古付幽

禽

過穀城山

秦王焚坑齊魯儒師儒道喪委榛蕪天殛其身雜鮑魚更遣老人傳素書又生拔山扛鼎雄特建沈船破釜功

不然章邯兵尚壯咸陽欲入當其衝况烹諸侯禍烈矣
不殺子嬰心不死博浪一椎竟何益阿房一炬乃更始
功成老人化爲石柰何重困重瞳子詩書仇復誰之功
惟有魯人知義禮穀城山路馬駸駸山頭黃石何處尋
千載魯公一片石土人猶護松楸林

東方先生故里

執戟排閭闔先生乃直臣能令佞幸懾豈與滑稽論荒
誕西王母侔優郭舍人我來經厭次芳躅仰星辰

請

訓恭紀二首

攝齊宮右个拜稽坐東隅

宣室蒼生問

是日齋戒

嚴宸霽色敷爲民詢使相

訓政屬通儒罔識書思對欣承

帝曰俞

通籍廿餘年資深得一遷尋常慙守土咫尺喜瞻天勉以當官善欽哉大吏賢主臣深感激不敢惜華顛

遣鏤兒由肥城省墓還金陵

吾母見背踰一紀汝初墮地汝祖喜汝祖愛汝

如汝兄親爲抱哺及溺齒汝生五歲始能言汝祖聞

之病且起旋驚風木歸山邱柳木塘

先大夫葬地

猶在桑梓

汝之 祖母葬肥城齊楚相違數千里葬經四十有一

年汝亦行年三十矣生晚未接 祖母歡兆域如何弗

省視汝今隨侍來京華然黃我當親拜跪命汝先行到

丙舍墓田宰樹細料理汝有亡妻合祔殯預謀窆窆相

山趾況汝母年長於吾僑寓無人奉甘旨汝宜遄歸慰

倚閭守身讀書課汝子我憾終天隔音容祠墓春秋闕

享祀一在湘西一岱西追懷少游淚如水

題石楞緣

文燐

石室容車圖

若家學士種桃處隔斷紅塵方軌路秦東門闕迥凌空

時聞阿香挾飛雨石棚石閣石嶙峋鼠不容穴銜簞數
神囂仙的馳小車月斧雲斤闢靈宇捨舟欲入武陵村
騎馬豈踏滕公墓追游酬唱來坡仙落英續紛入清醕
雲輶一去東海東風流衰歇花無主刺史我媿蔡景繁
鞅掌但見扃巖戶蓬島跨鶴迎青童桂窟乘鸞窺素女
千門廣廈豁然開羣經博士歌且舞書幣招延石先生
開敏子弟出閭伍薇露香從紫薇發鳳池文成白鳳吐
挾傳相隨膩顏恰鍵關不待昕徵鼓輪轅旣飾行班班
堂序齊登服楚楚幾於學舍不能容轂擊爭聽郊人語
量移旋促使車馳三山宮闕知何許石渠天祿須君才

揚鑣蹀躞東華土，合并喜聯人海轍。
分張佇設都門祖，願君盡紬金鎖藏。
華軒生耳由稽古，勞薪合向老屋懸。
披圖遙指江雲暮。

題陶雲汀侍御 討 皇華集

詩伯文宗例入川，况當負弩動星躔。
天彭井絡三千丈，杜宇開明四萬年。
蒟醬舊通南粵路，海棠新補少陵篇。
採風著意維風化，不負鸞書十樣箋。

霍山西去峴山回，晉楚關河入翦裁。
讀到停車題漢闕，憶曾走馬望秦臺。
渭城笑我難重唱，華岳知君未易才。
千載淵雲誰繼響，錦囊鐵網盡收來。

次韻賀耦耕編修

長齡

見題近集因題其詩卷一

有志事蒐輯張吾大國楚虬見兼咫聞數典慮忘祖詰
匠善掄材族庖奚越俎太史具史才人物綜前古清言
追寧馨雋氣傳阿堵疊疊春雲敷軒軒朝霞舉江鏡鑄
波心湘綺織秋籽鄂不照美移馥郁聯芳杜敢命宋衙
官概刪陽伴侶吾鄉近多奇倔强不可撫前輩難具書
新英得親覩醴粹見性情慨慷思建樹江夏有雙丁無
雙占文譜

謂黃花
耘兄弟

今遇陶通明詩源紹齊魯

謂雲汀

諸賢

盡探驪此事異刻楮功成三伐毛采耀五雜組湘西流
更深名南風可補老矣何能爲如繭初抽緒選樓策千

家秘閣登四部騷壇羣振響藍韋易袞黼

余時有湖南詩徵之役故

云

題陶雲汀入蜀出蜀圖

西川山川天下鮮我曾入關未入棧岷山導江瞿塘陜
我曾出江未出峽讀君皇華詩百篇劍月巫雲落眼前
讀君往來蜀中畫恍如身入天光鱗五丁一十二神女
猛容韶態紛紛下雲山經用更鮮明怪底詩筆奇而清
况復窮搜到青冥天孫機石隨使星嗟余少壯不努力
老大何能任攀陟一枝筇杖化爲龍浪跡粗官長澤國
無端又作八閩行不會乘槎但乘舶宦海年年滯瀕堆

羨君奇險輒驅回五帝以來畫樓觀何如峰壑橫几案
輪與先生弄柔翰

酬賀耦庚兄弟送別

行年六十官宜休面承

天語恩難酬溫麻列郡介山海飲冰未敢爲身謀兄在
三吳財賦地廿年選事霜盈頭若徙僻簡養吾拙謹身
寡過良爲優天末晨星望朋舊此來萍合多奇邁銅街
敲雨車難馳殿門咫尺違我覲君家兄弟仁與基修德
修詞最醇茂不因老耄而舍我晨夕過從講且究吏部
文憑尅日行買舟潞渚向江程絲鐸贈言鄒子向花潭

送別汪倫情衰年愛子期無忝平生不教陳咸詔切劘
終始賴三益我行雖遠心自慊

寓潞河城

重來四十年小住酒壚邊舊雨夜聞鶴秋風朝遲艤軟
紅何日息慘綠少時緣雖異維桑敬曾經寄一牋

舟行卽事

潞河水闊入平田柳岸低橫賣酒船沽飲無人自斟酌
秋風醉倒夕陽天

出都門有述七首

弱冠舉京兆往來客春明四十始得第墜事南征五

十晉一階循例瞻

闕庭報最經載

見謁選仍登程資深媿才淺

恩重感身輕莫言少推轂何事堪書屏

往時爲逆旅今來異僑寓
駒從未及門兒子迎於路
女孫素所喜上車劇謹慕
雛孫方襁褓向我笑無數
客裏有園園此閒宜小住
庭前杏兩株連理浥甘露
題曰駢杏堂示弗忘嘉樹

恭承先人訓訓之以惇篤
無俾觸屏風惟謹書馬足
聲華絕奔趨禮闈荷分錄
我來春榜開門外宮袍綠
新進

淵來源老夫慚式穀患在好爲師勉哉勤誦讀

京華多故人遠宦日以疎每因朝集至獲遂文酒娛同年爭建樹卿月照華裾不鄙鞅掌吏頻接生耳車最難四三友若與期會俱況逢多特達不次加美除諸公盡如此衰退當在余

蟬聲起高樹螢火出短牆秋風颯然至夜衾輕以涼同遊正歡會故交感衷腸東閣誰再開西州渺相望數年未把袂此日堪霑裳逝水急奔壑落月空滿梁

浮雲有聚散人事有合離朋友義相洽兒孫情更癡如何樂晨夕忽復訂行期推遷本無定去住難自持既非

溪頭釣又異橘中棊林泉無夙分筋力當及時揮手出門去莫使冥鴻知

買棹潞城東送者自崖反今年轉漕遲多緣運河淺復聞牆塞門致令水衝堰停撾阻迴艘倚柁况歸艍懸指江驛長逆計霜辰遠宦遊未渠休舟行聊自遣一任年矢催差喜布帆遠

靜海舟中遇嚴香府少尉

珏

津門歸乘上水船一程兩日猶迤邐忽遇故人兼吏隱虎嘯回首十年前聞君獻賦明光殿天保九如畫成卷殿頭分賜翠錦鮮海畔豈辭黃綬賤承平蕃庶生蔘民

飛鶚輕犯

紫宸雲空中一擊轟雷鼓竈上騷除靖毒氛天遣滑城聚餘孽

詔從秦塞出將軍禁旅紛馳號虎隊威弧殲盡豕狼羣
當時勁伍經由地君雖末秩曾襄事亂領妖腰法必誅
風驅電埽臣能記頌成三十有二章欲因宣布垂綱常
相逢握手多感慨屬余攬筆爲勘詳自言老矣無所用
竊效元和聖德頌仰看白日青天懸永斷潢池赤子弄
舟中無事一微吟短篷疎雨涼颼送

七月十六日東光舟中觀放河燈

胡蘇非故道尚有棘津流
瓜艇乘風上荷燈帶月浮
魚龍光照夜鷗鷺影驚秋
露濕江城樹香花憶畫樓

臨清舊城

夾河突兀古雙壘方牆壞壁縈
藤藟云是臨清舊城郭
荒荒月色照流水憶昔乾隆三十有九年盜渠王倫肆
蛇豕起於壽良掠穀聊蜂屯蟻聚至於此手戕官吏探
黑白身著婦女服紅紫是時百年無兵革總戎角之撫
軍倚

天威特命舒將軍三千禁旅如虎兇
築圍無俾鼠子逃
投炬全將妖骨燬翦除尅日馳風雷
噢咻安堵忘蒼瘠

更無兵燹話桑麻但見臺榭橫洲汜祇今運道波平隄
牖版不下糧艘駛

聊城魯連臺

田單卽墨恢全齊燕將聊城難自支其才豈出安平下
惜哉護間生危疑營蠅能使樂毅逐首鼠懼與騎劫夷
敵人未嘗加一矢貉子何敢當孤羆忽聞鴟叫傳飛箭
真似鴻書開赫蹏潰圍那有東游理斂甲惟籌北返期
數百言多爲齊計魯仲連子親封題如何守者讀未竟
罷兵倒牘去何之木必先腐乃生蠹腹心解體由南箕
巖下若無貫珠者大冠修劒空挂頤高臺畱作壘碣戒

豈惟排難高風垂

宿平陰縣

先公年六十爲邑長於斯小子十七八執策相追隨今
余年亦六旬外信宿重過如夢寐化鶴仙人尚城郭
雉兒童盡耆艾逆旅猶能識我顏龐眉爭喜談遺愛
指其樹曰公所畱指其石曰公所賚謂雲門山石不然當時開

剪伐定爲成例誰能貸因思我公曾有言爲政無輕小
利害摩挲手澤碑版存隱然在望

先公修城碑首四字

城東門欲

携壘推事墓榻愛護直與山同尊來朝垂涕謁祠宇奉

嘗翻愧桐鄉民

陶山展墓五首

泰岱羣峰母兒孫倚碧霄烟能分九點雲亦徧崇朝
立堂房古秋添紫翠韶隔巖人語響石徑指山樵
渴葬當時事清貧無奈何自詒君子穀不犯邑人禾
華表千年鶴蒼崖百尺蘿特營高敞地洞口曉霞多
昔侍登山屐高年日再周今余捨腰筇百步且三休
筋力思黃犢林泉薄絳騶况兼風木感搖落故園秋
少植數行柏今栽一兩圍思親如此樹投老幾時歸
人與石同瘦草無霜自肥何須買山隱是處足忘機
遠遊人子戒况復撫幽岑縱有焚黃禮終非戲綵心墓

田輸鶴俸阡表倩龍吟來往何忽遽時聞返哺禽

祭祠二首

仁粟頻叨

惠澤推少牢粗具饋南陔庚桑自昔尸而祝丙舍如今
櫝可材春社粉榆三徑在秋原瓜瓞百畦開遷官始獲
申追養未審何時得再來

恰過年豐備苾苾圭田尚可任耕耘鉅公爲撰修祠記
小子休忘誓墓文盼肉廋車分曉樹銜杯耆耄話秋雲
如何岳麓庭邊路燕翼長違數尺墳

過任城望太白樓圯未登

沛上之水清可釀沛上之樓雄且壯不見高陽舊酒徒
秋風蕭瑟高樓上樓高百尺與雲齊今來古往同攀躋
有酒誰人不解飲有客誰人不解携携客來往名勝地
樓間正好容君醉謫仙一去一千年酩酊無人樓自閉
身前富貴身後名惟有秋月最關情可憐今夜盃中影
曾向當年樓上明樓謝臺荒不可到少時猶憶馮翊眺
金龜不惜解知章黃鶴終當讓崔顥半生閱歷已如斯
樓廢臺興那得知君不見樓邊斜照催人老衰柳寒烟
颺酒旗

淮南舟中漫興四首

天低湖畔水木脫晚來秋竹露滴空渚蘆花飛客舟西
風纔拂面八月已披裘歸思蓬窗倚寒鴉上驛樓
舟逐曉雲影客涵秋水心涼颼欺短鬢殘月戀孤衾近
市揚州語懷香楚國吟蒲帆今得便烏雀亦佳音
憶昨邗江泊春殘夏正初杏泥隨小燕櫻筍薦鱖魚秋
到濤聲壯寒生桂影疎往來無幾日榮悴竟何如
披霧渡揚子挂帆今幾回波平秋滿鏡風細客銜杯支
港通潮入叢蘆拂櫂開青山喜迎我迴欲過江來

揚州

烟雨隋隄送畫橈綠楊紅杏占春韶二分流水二分月

廿四番風廿四橋雞犬皆昇丹客鼎魚龍欲聽玉人簫
神仙仕女今何在仰視雲霄一鶴遙

戲疊雙字三十二韻爲始歡中棄者解嘲

量珠寧計斛裁扇未成雙鼠壤風吹岳羊溝雨注江洗
紅紅上袖采綠綠浮缸愠抵湔熏馥流鶯語學腔燕開
駢剪尾蟾墜一鉤躡小閣羣居粲空房獨坐懣竹欄暄
放鴨花毯潔調龙最惡軒眠榻還教梵繡幢君誠垂曲
照儂似駕奔瀧簾密方懸蒜牀卑恰撫杠登徒元異宋
居士合稱龐顙顙看偏麗嬋娟儼似姚絲麻須備蒹葭
芷並紉苙謬捧金人掌頻窺玉女窗春盤纖手摘臘鼓

細腰撻碧椀慙盛穢朱綸笑服屨十眉修共鬥兩目怒
而睽嫉豈時粧豔謠緣甚口吮闔門將指措向壁或頭
撞不患前魚棄正逢狂兇降梧桐秋滿苑菡萏澤爲邦
忽報肩輿擁欣聞步履蹇草迷銀勒騎花送木蘭艘都
會遊真冶繁華視欲眊鈿車驅處簇瓊瑤珮聲琤供佛
香爐炷隨奚酒榼扛那知拋路礫敢比列錢釭非望承
光駭難畱秉性憇遣之殊易駿行矣便張雙蹕解遨頭
轡曾扶渡口缸寶釵親著髻斗帳別支幢他日移新艇
無勞覓舊椿

讀周希甫東岡詩贗詩以哭之卽次其往歲同遊

狼山韻

君今乃與世長辭世途歷盡忘險夷獨畱詩卷如瓊芝
心花振采標清奇少年制行高巍巍讀書稽古搜遺逸
青鏤管與油素携中秘殊俗親記之都盧竿舞雜水嬉
寫入霞牋光陸離秦山助筆增屢屨越溪靚女曳編綦
搔首巖頂天爲低掉臂自倚百尺梯當時蔣袁門戶爭
攀躋擢拔不藉東風吹况逢庭宇愁折榱遠道家書有
是非高堂日出銷烟霏索米長安道自肥晚始一第理
難齊改官國子天莫窺補外敢言五品卑撥煩幾歲纔
一麾註誤緣不善趨陪潔白自持同壁圭民之好德由

秉彝大賢薦舉豈數奇刺蘇韋白相等差拊循不聽馬
上聲可憐治河若登埤盡瘁驚傳松柏推扈言愛我和
天倪騷壇牛耳君所尸有時雄陣出偏師抑或賈勇還
交綏前年狼山喜繫維君詩右有而左宜壽陵失步久
未追豈知塵界空琉璃咀君臍馥傷心脾浮名如此拂
衣歸余時方引退君能知否長相思

爲胡蘭川太守

鐘

題沈石田吳山圖三解

讀畫分明是舊遊石湖畫舫趁清秋垂虹橋外天如水
人在吳山最上頭

包山源與洞庭通楚尾吳頭東復東似解瀟湘人怨別

寫將歸思付冥鴻

烟霞泉石似君多
十丈蠻牋捲薜蘿
我爲莼鱸來作伴
買山無計柰圖何

致書尚總戎乞貓

無鼠當畜貓
况鼠常側塞
家有貓大肥
但善眠與食熟
視若無覩
磨至反先匿
坐令衣履殘
竊廩勝螳蜎
最苦穴書倉
作意仇紙墨
何處聘銜蟬
一朝醢蜜唧
執訊千里郵
借材百夫特
將軍肅丰稜
安良在除賊
害馬無容身
搏兔用全力
常飼數狸奴
羣黠皆惕息
會須乞健者
爲余靖
昏黑老夫獲
酣寢仗君歌
樂國

除夕二首

賣盡癡散只合閒俸錢曾卜築東山
籊雲駒影官催去印雪鴻泥客倦還
聚煖喜仍隨伯氏侵晨元不報當關
簿書豈爲文章卸並檢詩篇一例刪

墨突而今得再黔設醴清酌爲君斟
先饗布福春生髻一飯知恩歲滿驚
鼎鼎同時爭水火樵蘇何日伴山林
桃符不必更楮帖綵勝依然著帽簪

題伏生授經圖和淵如觀察時淵如撰伏書注疏
自昔治專經壁藏溯秦劫尚書著辨僞先子有家法梅
閻皆證據陳義獨融洽考異登

四庫折衷垂令甲通儒追姚姒梅書雕成匣惟訂廿九
篇毋以序承乏泰誓殊張霸定宇在記劄匪惟研覈精
注疏細拱押自言洪範理鄭注猶淺陋寧非濟南靈誘
衷倒三峽況曾置博士釋奠神從裕斯圖類鑄金日久
架懸鄴玉躋手新題珍重同梵夾屬余一披圖古貌見
睂睫掌故拜牀前頗異臚顏恰微言當口授不櫛非近
狎君才軼漢氏聚訟徒喋喋大師若桓文牛耳誰先歆
鯁生讀父書道合喜心恰願常爲都養豈但牙籤插兩
家各孚翼雛鳳勝雛鴨

淵如詩有我子
長未訛之句

更看伏生孫永

振金華業

題淵如種花五畝園疊前年寓五松園韻四首

萬間廣廈百年身，點綴風光觸手新。
水木非君誰得主，園亭是處足留賓。
八厨修整蕃嘉景，九老科名王拱辰。
喜傍喬松藉秣蔭，綵衣親作種花人。

荒烟蔓草變芳林，寒盡苔枝集翠禽。
第一花移棠舍遠，

舊部曹南人以各種牡丹栽園中，余顏其堂曰廉丹。

畱餘春映玉堂深。

栽芍藥處曰畱餘春。

館其太翁所題也。

倚欄夢入池塘句，繞砌香生蕙草心。
培得胸

懷元氣足，階前寶樹茁千尋。

槐陰彷彿第三廳，野趣偏辭鶴蓋停。
種菜半分紅藥圃，縛茅橫架白鷗汀。
樓臺雨過山如活，闌闌雲興地有靈。

也許窺園裙屐入

園中有窺園閣

草堂衣露帶春星

鐫書造屋爲誰謀一種清娛侍杖鳩除却古文無長物
何妨今雨不來遊抽簪喜有芳塵步題榜慙無好句投
自笑巢林猶未穩花時頻約羽觴浮

潤州買舟往吳門是日春分

襖被偶然出羣山江上來柳陰呼小艇花外問新醅一
半春寒減三分霽色開不知香雪海猶賸幾枝梅

鄧尉看梅同吾半客

學海

蔡曼綬

成輅

五首

記與梅花別經今十二年頗疑春近暮翻喜夢重圓消
息頻傳驛因緣偶放船舊遊如遲我萬頃玉田烟

夜月三人約春風五兩輕山標來客姓

賢泉名
吾家山

石泐舊

題名有病嫌君瘦無詩覺我清招提逢老宿倚樹話銅坑

一夜濯枝雨三朝擘柳風尚搖花未落不信笛能空白到十分減香於無意通怯寒同骨相相賞對春融

登閣客千古

謂元墓
還元閣

遺文未盡刪美人不可見古意自

相關往躅夢中夢重湖山外山洞庭遙想像琪樹更堪

攀

夕陽橫不下遠樹入歸鴉穠李已爭白蒼顏無可華高
人耐冰雪吾道在桑麻補種非難事未知何處家

虎嘯山後看玉蘭作

玉妃結袂還瑤臺蘭宮琚珮紛翻來千斛龍涎灑紺宇
萬條銀燭難雲堦自是輪囷有仙骨芳春蟠根月入懷
霓裳綴跗攢片片冰壺濯魄融皚皚豈惟縞綦失其潔
并使旃檀無與偕今年花事何太緩似我之官遲且迴
二月偶鼓金闔櫂十九始見銅坑梅是日風狂病且作
藥煩醫俗眼頻揩梅花罷後此花放野村官屋皆塵埃
虎嘯山背吾雅故千年上物藏烟霾揭來繞廡足重繭
相看坐石衣生苔羣葩爭擁浪層疊老幹橫鬱山崔嵬
已茁孫枝等松茂斲埽落英成雪堆人言花石綱之棄

我謂韋白手所栽不然風流蘊藉那得此坐令潑天倒
海無詩才此行所獲真奇哉

橫塘展唐解元墓二首

孺子亦知唐伯虎才人爭說李青蓮超然不墮強藩劫
獨自能參善眼仙鸞鳳鞭笞馳世走煙雲供養得天憐
搜墳封樹殊多事況又重尋隔十年

中郎何必有兒孫同姓千年古所敦今日停舟寒食節
偶來沽酒杏花村一杯竹葉澆墳土三尺榛蕪翦墓門
笑指橫塘城市遠齋頭猶挂阮咸褌

桃花庵看桃花二首

昨日橫塘插柳來小桃幾樹未曾開芳烟引入桃花塢
記得桃花手自栽

聞說初栽半畝塘曾經磨折小紅羊此閒不似元都觀
付與東風自主張

桃花塢唐解元墳四首

地近要離墳橋通臯伯廡頗似劒池雲結成一白虎
埋骨知何處橫塘舊墓門胡公碑在此應有未招魂
重立才子亭又被風以倒墳頭虎杖生離離書帶草
春草悴還綠人往不返舍才名至今存榮貴朝華謝

望揚子江

欲渡苦無舟徘徊謝遠遊大江千頃浪自在一沙鷗宿
霧山光破歸帆樹影畱甘爲僖父語名士聚揚州

自丹徒陸行返金陵三首

風波辭大舸下澤趁輕車細雨不成點漫山皆作花樹
遮挑菜女水抱買漿家遊蹤非行役良常入望矜
雨暗窗遲白風和樹早青驢鳴宵柝斷鳩喚曉漁醒得
麥農如佇逢花客欲停攝山山下路草木自芳馨
王謝堂前燕宗雷社裏人昔橫金腰褭今臥石麒麟半
壁山頭霽重門郭外春我從探梅返花氣在衣巾

碧桃花

梅花看罷看桃花
花鳴東風落晚霞
桃葉渡頭紅雨亂
獨畱一樹待還家

木筆花

玉蘭爛漫想辛夷
已分開殘傍屋楹
忽見兩條椽筆在
蘸將霞采寫天墀

木瓜花

庭前有楸樹枝柯爲連理
秋瓜結纍纍應名報恩子
豈知春明媚其花先旖旎
剪刻英瓊瑤紛如佩玉蕊
輕含海棠豔小貝山茶紫
偶飄蘭信風莫詫桃蹊雨
清香何處來蘊藉已如此
奇馨人莫知落實乃稱美

枸杞花

階頭二花犬近人不入地當春發華滋掩映何蒼翠其
瓣紫而深其心黃而細向來秋始花花落子垂穠春花
世罕聞不供天隨食花繁每無實再花何獨異因思青
精子足比丹砂餌菁英灌千粒色味釀四季願毋摘其
苗多爲却老備

黃楊花

盆中黃楊樹其高不及仞枝葉何蓊鬱去年方厄閏今
春雨露濡由蘖氣亦振葉底開金粟時作木犀認鄂柎
結青珠三稜小而峻頗如道者冠不上美人鬢幹旣輸

崢嶸花亦愛矜慎且自參矮禪何知有風信人如求速
化往看朝華舜

龔園看牡丹贈葉花隱兼簡汪鄴樓秀才

二人皆
袁隨園

弟

金陵三月花事譁紫陌交馳油壁車爭傳龔家園子裏
百帳春韶排作衙白門寓客腰腳輒看花宜近不宜遠
花隱愛我同愛花爲我與花謀一面園行十里城西隅
有花之處皆停輿到門著眼春似海始笑人間富貴非
歡娛嫣紅姹紫錦不如翻覺潔白爲仙姝倚牆默默知
我意淡屏脂綺含清腴十畝香風坐啜茗爲花祝風毋

太猛看花須是及時看今日應勝明日景花隱花隱真
解人性情頗得隨園真歸過隨園花尚好風流未艾有
汪倫

陶山詩錄卷十六

善化 唐仲冕 六枳

連楸軒二集 乙亥四月

贈伊墨卿太守 秉綬

淮南曾載酒江上久分襟笑我依人活知君上道心宦
情消郡邑歸思寄山林賴有彈冠興重聯對月吟

題秦敦夫編修 恩復 彝器圖冊

秦宓淹通學淵憲五笥名齋珍石研吉金已積二十三
商周兩漢如親見商父丁彝父乙爵子庚有足爵可奠
子父癸鼎父癸觶商人尚質文無羨周盃無銘制則精

旅盤旅簋方圓變父丁卣與享父卣別卣未識誰所建
叔邦父簋父乙角子孫永寶供酬獻敦蓋郡公敦仲駒
博古圖載宣和殿漢氏熏爐著陽泉永元鐙檠一足鴈
陽嘉之洗建安鍾大中八升鏹斗宴大衛無極鼎蓋存
帳構平廣良金鍊登食官傳鏹字疑明明漢器足飲醺
隸分篆籀費考求朱爲江藩宋操鮑震皆時彥豫章中
丞詒經籍北平學士窮史傳我生未習岫嶼書欲一臨
摹手先顛家藏左判銅虎符吾亦愛吾鼎非贗

揚州客館雜詩九首

鴻鵠與雞鶩皆爲稻梁謀騏驎異鶩駘能無芻豆求人

生無貴賤衣食各有由譬彼爲人傭厚薄隨所酬量力
擇易稱果腹無餘憂

倉頡造字時胡爲天雨粟字之義爲孳謀生或可足少
小學識字書史勤緝讀中年無所用刀筆習治獄迂拘
非吏才安得有餘祿退而求故紙自謂堪鈔錄識字能
有幾用之乃見促方悔兩蹉跎何當重秉燭

麋鹿束衣冠爰居饗鐘鼓本非性所樂自覺情彌苦我
以蘿薜緣強與簪纓伍受命生內熱辭榮得和煦沈疴
旣盡捐宿過亦可補雖有營巢累猶勝聽朝鼓雖爲賣
文活且免治官府

館舍雜囂塵樓宇屹以高院落纔數席廢圃長蓬蒿我
來事夷瓦礫亦全拋買花得一擔疏土培根苗織蘆
障炎曦好雨不待招安櫺紅照眼帶草綠齊腰名花豈
易覓卽此慰幽寮

快雨如甘膏豈惟花事喜昨逢賣花人云自去年始曾
未見檐霽今乃瀦溝水菜甲鋤旣佳稻秧蒔尤美誰料
雨兼旬爲霖不可止屋漏到枕席舟撐入街市盆荷紅
欲放瓣瓣隨風萎爲花喜還惜得意焉可倚

雲氣尚欲騰雨脚忽然斷夏日雖可畏伏陰必當散積
雨衣裝棉乍熱汗如澣所居旣湫隘歎蒸倍煩懣翻思

風雨急能令酷暑緩陰晴在浹旬愛憎若旋管人苟求
稱心造物亦難滿

息交勢所難詣人禮所尚無事此戲門有書或遺餉竹
西歌吹地紅樓喧畫舫老子興元淺形骸敢放浪牧之
謀略通罪言思理暢贏得青樓名損却紫薇望名賢多
坐是風流誇跌宕

搔首賦停雲遊蹤感印雪逝者空寤歎存者半離別此
來聯舊盟同心生茂悅或情追箕皓或志許稷卨更有
數千里恰遇重來轍足音喜跼然往事共詳說坐對古
松陰相期勵晚節

古人重行旅何必在遠道昨夜夢見之阿兄正耄老就
傳兩雛孫識字有多少盈盈一衣帶冉冉若蓬島雖非
奉尺書未免圖一飽歸飛且遲遲况復入樊鳥不如守
衡門舉室懽相保

題刁錫齋副將

隆太

射獵圖

久解青絲絡曾鳴紫玉珂
塞旗隨李廣健飯憶廉頗
飲羽橫蒼兕開樽卷白波
年過釣磻叟髭鬢尚無皤

題墨卿所藏黃庭經榻本

初搦黃庭一十字真成蒼壁十二雙
最先題作復州刻似元人筆力能扛
鶴灘先生文章伯八言作頌除紛囑

鶴灘題道德之
歸天下奇觀

華亭流入江光室四明重展墨農窗

墨農

薛楷崇禎壬午在
四明兩窻三跋

墨農已往墨卿得百數十年傳翰墨

虛無怡懌筆從心後人何用多推測吾聞黃庭不一體
其一草書張伯匿此本猶有晉法存未定唐初孰摹勒
想見搦管揮豪時凌空使轉方圓宜柳公心正程子敬
書雖一藝通希夷墨卿筆法有神解剛到好處人難知
道德之歸有日矣天下奇觀當寶之

七月一日

歊蒸日日望清秋秋未來時氣已道雲過雨飛三兩點
暑殘涼到五更頭鏡中衰鬢驚蒲柳郊外斜陽散馬牛

不種梧桐多種菊待看晚景把香甌

七月七日同錢次軒觀察

棧

舟行有遲因遊山光

寺

天上河橋遲河鼓人間誰遲舟橫渚船頭延望遲不來
山光寺向船頭開寺門題有阮研字不見山光見水氣
是時新秋熱如火來覓清涼地裏坐老僧煮茗鄉味香
問之沉沉楚音夥一箇蒲團七椀茶解衣欲盡嫌袈裟
花院陰中森竹樹水田門外橫禾麻禾麻未秀猶待雨
長淮大漲牕頻舉難爲都水與農師調劑方知治民苦
身不治民弛負擔偶然觸熱得禪庵若使入山深且密

那有嵇康七不堪歸來案戶銀河墮不遲雙星早自臥

壽吳穀人祭酒錫麒同年七十

同年四十二年經偶聚天涯幾葉萍祭酒尚酣真一酒
晨星長見老人星先生弟子班班秀名士神仙筆筆靈
今日選樓書局設操觚還奉杖藜青

祖帳當年重

帝都東南壇坫屬鴻儒申詩受自浮邱伯荀子尊於列
大夫手扶爲章雲是錦頤含正味道之腴集名有主人
正味齋
合樂延諄誨嘉會耆英入畫圖

讀墨卿遊草因贈其行

遊遍武夷廬含毫道氣虛六朝小謝句兩漢八分書閩

學期於用坤爻正厥居

君方注易

願將詩裏義敷化到窮閭

題汪心農試硯圖

贈我新帖皆名書贈我好墨如元珠帖墨齋名署試硯
屬我爲題試硯圖試硯有齋我未到藏齋之硯何能諛
且喜題圖盡老宿讀之一一生欣愉或云蕉葉白或云
紫玉腴或云翡翠搖碧羽或云鵲鵲含青矚雙鬟小試
簪花格四友長陪水竹居因美所寶同玉組便應號室
爲金荂况復隃麋經手製雲液定割山雲膚書家流傳
又如此石君風韻當何如我歎磨人磨到老重磨舊硯

堪抑揄安得君家墨海貯墨海不枯願君更乞一歐與
題鄂剛烈玉甕頌草稿後

帝堯得甕喜賡歌獻頌承明古調多視草精英餘草稿
碎金文字亦金科神威鑄鼎姦全掃臣節銘鐘氣不磨
嶽嶽懷方存梗概况從湔拔賦卷阿

題汪心農守梅圖

一鶴傳家冷梅花剩幾株由來清白吏自是列仙儒繞
屋芳根補鳴陰瘦影孤柴關鎮長守先澤在冰壺
爲有清芬誦新巢畫舊廬案披高士傳楹發昔人書我
亦懷風木何時守里閭揚州有飢鶴帶月擁鴉鋤

題趙渭川全年

希璜研箴遺照

昔我同年友浮家在袁江余時官東海信宿渡橫杠折
簡縱談讌寒醅發罌缸因窺鄴架書筆硯羅軒牕隨侍
兩幼子倍文不停腔宦稿數百篇望洋我心降古歎每
聯襪新別輒拙糲誰知風中蠶竟落隴頭瀧君歸道山
日支祁肆春撞浪幾齧前和勢已吞空峴簡編患沉浸
况若礎與缸幸有桐鄉民千里迎旛幢萬家助封樹何
必歸鄉邦渭川曾令安陽其士民迎其柩葬安陽我今髮種種懶聽鼓逢
逢差可免謀訴終難謝紛咤郎君輩相遇足音喜來覓
屬題研箴圖仰見昔年龐我聞楂作覘化魚難繫橋君

以硯爲筏萬斛力能扛有如三乘旨折蘆履不雙獨駕
墨池雲瀛洲看流淙鐵船應笑我感舊挑殘缸

題名宦白秋齋副將愛聽讀書聲遺像

遼山十里聞蟪蛄仁聲入人久不渝日余初調松陵宰
距公專閫三紀餘故老往往道風澤謂余綏戢當無殊
驚脰湖與南潯接支港曲渚藏荇溝通多匿設橫柵
舩尖易駛裁方村邨鼓纔發公先至威令真可警夜漁
年遠政弛宵小伏我師其意嚴追逋毀其神叢編其戶
不時鼓棹行菰蘆船柵之制盡修復溪民恥復爲穿窬
其時徵文纂邑志爲公作傳美非諛及來揚州聽輿誦

揚人感戴同吳歆衛民捍患合祀典吏民上告

天子俞我幸得爲年家子惜生也晚未接裾覩公遺像
謹再拜說禮敦詩將而儒如在洗心亭中坐期門子弟
環讀書公於校場建亭名洗心設義塾令兵子弟讀書其中趨庭塤箎誦翻水據
座裘帶歌投壺書香已食南宮報治譜亦與中年俱神
之聽之無窮已克繼家聲視此圖

題鄧湘臯孝廉顯鶴蓬萊觀海圖

我生人海半宦海不作風波亦驚駭遊歷偏與海爲緣
少小隨侍經渤海東萊城上望成山成山冰雪白皚皚
中年屢宿泰山顛午夜搏桑飛霞采爲觀出日聞砰洶

輒思向若蕩庸猥渡江作吏近吳淞城頭潮汐日飄灑
遷官胸海泰東門料理鹽筴兼稻蟹郁洲遙與沛州連
常在洪濤歌靄廼選格一麾指八閩老怯沃焦高嵒崑
讀君蓬萊觀海圖如讀君書見真宰摹擬蜃市三神山
振觸魚遊四十載衰殘合機挂星楂好向湘江擷蘭茝
願君賣洲乞杖乘織錦支機鎮相待

題歐陽礪東

紹洛

詩卷之五六後

在唐如柳宋如蘇真氣充然山澤臞豈管烟開秋所桂
盧龍雪滿夜吹蘆上仙冠佩三花舞大將旌旗萬馬驅
南嶽高峯七十二獨看紫蓋一峰孤

次韻題鄧湘臯詩卷

風騷敬維桑學詩自笄鬋一言思無邪正始鋤異種半
生老輪蹄未得終畝壟交遊跂高詠歲月付閒鯨每聞
楚有材狂喜至曲踊著述足千秋鄉井亦增重資水之
所經高平山勢聳中有三君子首望各身攬槃槃歐陽
生出語令人恟得山氣鬱蟠得水氣濛瀾五管及三關
取材獲高拱傷哉晏同叔七歲珠出蚌意合九和弓詞
鍊七返求方冀幹昂霄豈知蠶化蛹奚囊贖幾卷蕢棗
芟蒙蒨賦成李賀樓筆埋劉蛻冢鄧先饒於才秋江挾
潮涌汨汨肆排宕積塊不能壅真如九臯鳴振鬬毛無

駢亦如萬夫雄麾撓手自擁沙汰揀金鏐方圓中珪珙
時爲登阪驥不作入牀蠶袖中有東海波濤堪振恐三
君特精能視我徒長冗山川固鍾靈師友亦接踵其前
有孫登第弟共矜寵又有吳與楊進道稱其勇一邑數
詩人造物乳生湏如何畀付奇藻飾復桎羣亡者爲冉
顏存者曰周孔但苦刺投門那有書赴隴邗江始遇君
足音報鵲驪示我歐陽詩畦畛力墾耩屬序晏盈編悲
緒春草茸科名成何用不如積禾稭今年湖湘間稻熟
飈唼唼感君獎藉辭歸興關飛動

渡江返金陵省兄三首

無端生計托傭書歲月勾畱暑又除門下濫叨魚客比
江頭遠望雁行疎心懸薪桂偏嗟老眼熟金焦莫問渠
骨肉有懷衰更切還家何必定鄉居

兄緣愛弟未先歸期我還階更著緋雲棧幸回輪駕更
風波屢涉怯帆飛蒹葭瑟瑟催秋管促織淒淒上客衣
却笑休官尚干謁不如重整舊驂騑

仕有因貧只抱關大夫須問職無癯衰庸於事終難濟
乞假爲生亦自閒見說湖湘新米賤似聞朝市故人還
江山信美非吾土且進香醪博笑顏

金陵紀事上菊溪使相

聖主當陽日當午台斗秉曜臨江潁斷無熒惑化童男
不信河間謠姹女如何僕區揆伏戎暗含沙影傳蜚語
妖神假託石頭靈狐鳴欲學篝火聚乖龍繆刻作篆符
瘕犬狂嗥書過所顛倒甲子違義和縱橫牙爪供猊獮
無端造逆累千言一時播惡遍幾許希圖中傷搖柱石
便逞回惑到閭伍

國家恩澤淪肌膚草木禽魚盡含煦宵小戾氣外

甄陶黎庶同聲置刀俎節相謀深出淵泉清秋令肅馳
風雨迅收暘睽羣物彪先鎖彭亨一鬼姥罪狀無須用
網鉗愚迷真已入肺腑黨與牽率如連雞渠魁奔竄猶

言金卷一
首鼠六丁電掣何能逃四面羅張孰敢拒神姦一一同
鑄金邦汙纍纍就園土不敢專殺閭諸

朝盡付市曹斷腰膂我公大范藏甲兵自昔翁歸兼文
武洋寇逋誅二十年雄威振蕩一朝舉海中鱣鯢尚易
平竈下騷除奚足數豈知刑典重無將況復皿蟲乃爲
蠱越甲那得鳴吾君桑土綢繆曷敢侮豪毛早拔窮根
株芟刃能芟勝斤斧造言千紀當屋誅妖腰亂領誰容
汝天垂至教流風霆地足生資長禾黍除莠安良
聖訓彰摘姦發伏臣心苦丹書灼灼象懸門赤舄几几
鴻遵渚凡我小民懲此曹正經順則樂仁宇

還金陵壽星橋池館四首

橋邊客館近橋外野塘開
鍾山倒垂影招我入山來
入山不見影但見山崔嵬
崔嵬不可上秋樹鳴庭陔

斗室吾書齋四月扃其屋
架上有蛛絲階前生旅穀
雖非事遠遊還往徒碌碌
點檢到小園平安報叢竹
明月爲我圓照我盃中綠

木瓜樹連理幹合渾無迹
交柯互縱橫結實垂金碧
昔兄共婆娑仰視時岸幘
抗手摘一枚浮缸飲百益
相期腰脚健相戒遠行役

庭前兩叢桂亦有連理枝
枝條旣拂鬱花蕊常蕃滋
今

年花較晚似怪歸來遲臥閣忽一日香氣通重帷因感
王孫遊欲賦招隱辭

龍潭守風

聞伊墨卿客歿揚州往視其喪

無端風雨太憑陵枉渚孤舟廢寢興容易變寒秋後熱
最難忍淚老年朋潮聲颯灑催征鴈荻影箭移動客燈
空憶久要成永訣擁衾獨坐夢瞢騰

江口守風二首

冒雨到江口江風浪不平蓼花添晚景蘆葉做秋聲勞
逸關人事存亡重友生結言愁有後帶水尚盈盈

秋雨連三夜孤舟隔一江征鴻度雲海落木到篷窗漏

濕難欹枕波深更繫樁懷人渾不寐隔岸寺鐘撞

瓜洲曉渡

潮平不放惡風顛我舸相隨破曉烟歎逝幾人悲宦海
臨流何日賦歸田此中定有湘江水欲去非無鄂渚船
底事羨魚操釣艇休論富貴與神仙

輓伊墨卿太守

江頭鯉魚風乍起芙蓉片片墮流水故人相隔半江秋
冷雁銜來一名紙紙上毛生字跡新懸肘作書認猶真
似期見面渾無語可憐握手纔兼旬自從試守到袁浦
見如舊識同聽鼓君治淮南我淮北檢災拯溺走旁午

帝簡廉平作揚州澤鴻安集民有鳩至今人傳紫芝句
當時歸送鬱林舟師帥由來重典郡賢者所至甦其困
眉舞爭迎出山來肺病忽沮朝

天願契闊懷思經歲年相逢三月蜀岡邊諷誦新詩每
擊節臨摹古帖頻題牋猶記虹橋訪早桂桂華未開風
雨至迴船空望六一堂登高遙訂重九會君疾初平我
整違屬君且緩鳴驂駢騎尾御鵬往何速素車白馬來
已遲嗟哉誰復攻吾短物望民譽况希罕神明固合依
甘棠氣誼那堪遇舊館却喜哲嗣敦前修詢君詩集先
雕鏤欲竭精思志其墓未知九原心許不勝帖箴銘對

書閣千秋事業君無忤他時定有烝嘗民綠楊城郭聞
歸鶴

題何星田梅莊後集次謝青荈太守用坡公韻

江南秋滿赤梨葉忽見窗梅點絳雪

霜降後十日寒前絳梅發一花占

者言有芳信通驛使傳來雙妙絕何涓作賦元清道謝

朶裁詩更廉折題襟新聯韻欲流懷袖重探字未滅蠅

聲喜逐老驥飛

集中附戴拙作

翠苔終讓長鯨掣最憐海嶠和

長瑜不羨安州費紫纈結習猶拈天女花懷歸欲服雲

母肩憶昔携手岱千尋而今過隙影一瞥看人衡續與

心違把君卷帙從頭說梅莊筆得梅精神斌媚仍堅廣

平鐵

題星田鐵獵巡梅圖次集中代東寄懷韻

少年與梅別憶梅賦停雲携手客岱麓聯詠逾宵分君
忽動鄉思先我還里門里門得三友鳳尾兼龍鱗寒香
作供養清調傳歌行鬚眉寫雙管腸胃照九英迨余官
江南江梅徧江邨因思何水部不減明山賓招邀到齋
閣尋詩偕田更或於蘭若近常與筇杖親吟時月入帳
醉後天橫參孤舟檣鄧尉東閣懷廣陵猶記畱鶴守深
恐寒鷗盟湘梅久相遲手植都成林枝南與枝北苔岑
送歸翮宦遊感離居歲暮傷初折病肺怯早涼名腸生

內熱難求種樹經空寫來禽帖旣宜嬰美疾時復檢
難居肆士有模反經民無賊衝寒敢度阡廢事愁滿百
馳烟勒移文低柯埽征轍每思世外仙不見心蘊結君
歸近廿年真賁受十冊玉潭似孤山茆屋間綺栢田莊
只叢爾人梅兩超絕未放珠初胎半開眼微睫索笑傍
檐寮親巡歷岩壁鐵獺隨青獼高風追笠澤讀君遲梅
詩天然超篆刻玩君巡梅圖彷彿見顏色寫真何必真
妄念無起滅屬余補離騷還期勵晚節小梅報小春千
里通茂悅驢背本夙緣鷗背亦長策冰壺敦歲寒鹽鼎

讓時傑

兩宿西來菴次壁間筴江上韻

入世塵心起還山宿願虛
固應逢雨阻正是出門初
解榻親禪寺濡裝惜篋書
更殘渾不寐寒月滴方諸

句容道中遇雨

雨行何以聖客寢豈能安
合逐茅盈駕偏彈貢禹冠
石頭妨路滑驢背得詩寒
記取良常道山雲入望寬

旅店遇雪二首

下澤連程雨符簷徹夜風
一生寒到骨數點雪飛空
杯泛茅柴白爐炊餠飪紅
人生元逆旅何必歎飄蓬
地僻人聲寂風高雪意凝
板樓宵聽雨土室晝挑燈
小

住知無定幽棲愧未能却緣枯坐冷江上憶漁翁

宿曾宿店

昔年曾住宿今日又馳驅坡老新春夢黃公舊酒壚雪欺寒日薄風捲短篷枯候館重經處雲深旅雁呼

丹陽道中

雪殘猶有淖風急轉無冰黃葉逢人少丹樓記我曾足寒思撫字裘暖悟修能霽色褰帷入春臺喜共登

丹陽登舟

兩程行五日一艇向三江轍謝泥塗困波容舴艋撞禦風浮蟻盞受月啓珎窗何似長局戶書樓剔夜釭

夜過毘陵

送舟嫌汐小近郭喜更嚴客枕微聞櫓郵亭已報籤酒
顏綠雪減帆葉爲風添水外雲生處

夢中句

寒吟入夢恬

胥江夜泊

往歲頻携鶴前邨欲探梅詩將新稿袖花自小春胎山
月聞鐘後江橋載雪來五湖烟水闊倚棹重徘徊

自蘇至揚口占十首

睡苦宵長瘦不支非關聽鼓怕耽遲少年莫怪衰年早
五六月間日出時

錫山南與惠山連窳堵峰頭映巨川不信一泓清釀酒

甘居第二品名泉

夜半爭舟破客眠
毘陵水驛隸呼鞭
分明漕運回空橫
不打糧艘打小船

丹陽鼓棹到丹徒
風水相遭日未晡
頗訝過行占利涉
半生留滯是征塗

我編側塞京江口
便欲捨舟登岸行
夜半傳呼潮大上
潮聲分送櫂船聲

江頭正覓帶江船
又見波枯未得前
望海翻嫌潮有信
候潮如候鶴書傳

待得潮來潮又低
長江橫束口門泥
金山應怪歸田緩

故與三山一樣迷

茅檐人負三竿日荻港魚游一尺潮身退未歸重捧檣
船行欲渡且停橈

都說中宵水可浮却緣風力送輕舟帆從北固山頭過
人在南柯郡裏遊

半夜寒潮盪客舟江雲海日到揚州羞言垂暮親塵鞅
騎鶴重來文選樓

題胡黃海遊黃海日記後

君居近黃海因以山爲號行年六十五始獲一登眺客
還自匡廬乘秋躡奇輿排日記所經題詩撮其要昔余

勒泰山擲筆天門嘯君行偶見之神交得書報謁來廿
餘年欵門乃一笑握手平生歡先以斯遊告前海與後
海十日得大較爰讀記與詩天都恍親造憶曾約同遊
欲往誰爲導山色有常春人生無再少君趼幸能重吾
臂恐難掉名山多未逢白嶽不足道

自揚州至海州口占十七首

言跨揚州鶴尋盟海上鷗機心恐未化飛避再來舟
湖水濶如海湖隄高似城至今思邵伯一出爲蒼生
夜泊淮海南曉渡淮海北流水送寒鴉征人不肯息
寒宵上水船百丈牽人住曉霜如雪深家家賣芭屨

進食豈望報推食竟寡恩須知五鼎食難辭五鼎烹
前日廣陵江今日淮陰里枚叔去千年濤聲猶在耳
一出淮安城不似江南路平楚曠無人日照霜黃樹
秫稽植門廡碌碌臥沙渚村童斲溪冰敲作太平鼓
落日渡黃河今渡非昔渡年華不如水水來多於去
寒飈變冬旭海水入胸陽話舊迎童叟憐余滿鬢霜
風聲欲釀雪月氣自成霜燈影夢前度一事一思量
慈母今百歲游子隔重泉望雲依泰岱四十有六年

是日

爲先太宜
人生忌日

披衣衣線穿銜杯杯水寒蘆花飛雪滿樹葉逐風殘

無雪風更厲凍醪不能春垂老事行役合受阿母嗔
渡江七百里始見海州山山如舊識不改昔時顏
伊山最有情一夜河冰塞舍舟沿岸行斜陽送山色
鑿冰通小渡望火投前村估人聚板浦高士在蓬門

渡河

曉旭風帆稱客懷懸冰萬里一船排浪頭鶴望雲同渡
夢裏鮫綃鏡乍揩夢人授以鮫綃移艇凍黏皮褱倚帘春試
杜茅柴輪蹄滿路翻殘雪明日沖沖又到淮

阜寧道中

射陽湖外水流東催送行人歎緒風冰面雲飛鴉陣墨

樹頭日射鵲巢紅役車歲月當垂暮野馬塵埃入半空
河海害消纔利長冬官何事又圖功

山陽道中

本自無羈束翻然奉簡書始知閒是福方悔計元疎鴻
鴈鳴中澤牛羊避大車冒寒甘況瘁何以慰窮閭

淮陰

漂母空祠屋王孫有釣臺旣當爲國士原不受人哀漢
應開基運天生震主才丈夫足謀略安得老蒿萊

淮安舟中

買權長淮路淮流喜未冰鴈繩銜落日漁舍點寒燈下

水船宜櫓中宵被有稜舟人覺來往笑問客何能

行至海州許生月南迎以詩依韻答之

澤門詛祝病子罕十載重來四牡瘡掌邦土有司空書
琅邪先斥齊兒緩可憐海濱斥不毛窮黎一日難再飯
又遭河溢騰桑湖流離繪圖不忍轡當時便欲遷尾閭
持論安能不直侃微禹其魚今使相衝風冒雨屏蓋幘
立排羣議軌始順奠厥攸居巢未穩塾隘却得淤泥肥
長養漸覺鹹鹵遠畝收十鍾亦偶然迴憶沉菑淚在眼
計臣忍進載師策首陳利病賴公袞與水爭利民爭田
二語真可破六筦日出之民愿而醇願以輸將酬飽煖

吏人緣飾務求多經界紛拏貴執簡我何能爲效馳驅
非其所好徒惘歎無端攬轡思范滂是誰推轂到趙綰
繞亭猶見野雉馴持鞭促使使跛羊羴輪君起廢鍼膏肓
欲作調人付一莞

月南以穀梁
釋例索序

回至揚州許石華孝廉寄長句即次其韻

馬卿那復堪乘傳長孺久已薄淮陽役車況迫日月除
閉關又發天地房勾當公事其名耳爲懷舊雨情難忘
君家兄弟吾三益五月緘詩到維揚恬吟密詠不能和
如挹天瓢傾玉漿竭來海上稽壑關成事安得瀾回狂
徒思文墨寬分寸不如文字尋偏旁且喜令弟驪相迓

謂余老矣猶康強羣從開筵設几榻子姪撰杖携壺觴
坐因話舊濕衣袂出爲環觀塞帷裳淹畱甚欲旬月住
程限還如星火忙絕憶仲氏遠負米江淮千里隨奚囊
欲向北堂參末座如與南郭隔重牆一曲驪歌侑離席
百番魚牋壓歸裝竹西信美非吾土秦東却望同家鄉
傭書且逐牛馬走抱牘生憎雁鶩行無奈冷氣砭肌骨
反類熱中疲津梁旅館閉閣十餘日起居不適藥不良
今年頗似龍蛇厄梁鴻先去哀錢塘謂山舟學士姚崇已死
姬傳郎中趙嘏歿觀北鹿鳴重宴虛虞庠方叔揀尚書朱老門
太及伊墨卿谷西阿翮然魚鰕而鳶鵬笑余齒野德未

逮尚須圖飽藜，覓腸世外酸鹹日。作惡宦中甘苦曾備嘗，兩年引退病亦退。塵鞅再掉志乃荒，憂患無窮勞肝肺。功名未必書旂常，飛鴻遺我書一紙。道里不若音節長，君同赤汗跨叱撥。我似長鬣呼鯨鯢，以此沉疴灑去體。勝從子登彈八琅棠陰迎節入圖畫，來詩云新作恐棠陰迎節圖被姍笑宜卷藏。刺史遲君續前志，十年節行時而颺。積雪峻嶒一鶴瘦，寒飈異氣萬木僵。郁州山自南方至，中有老梅發幽香。

邗館度歲病瘥有感六首

一覺揚州夢未醒，往來閱歲舊都廳。寫書亦是風流過

采藥難求草木靈病想問牛逢丙吉感生歸鶴話丁令
謂伊墨卿竹西歌吹繁華地著個寒酸稱客星
谷西阿

作吏年年病不堪投閒歲月任浮沈梳翎未免羣鷄睨
振鬣何當萬馬瘖南斗箕張原有口北山雲出總無心
陰陽人事還相擾至竟馳驅異素襟

未信黃羊祀竈君追逋空誦逐貧文諱錢雅愛王夷甫
起債難逢谷子雲海吏自漁魚不出塞翁非牧馬成羣
此來豈爲腰纏免落得寒樓月二分

郁州返旆暫停驂臥對書燈寄一龕骨格本慙空冀北
頭銜又唱望江南種瓠鄉在無何有鍛柳人思七不堪

莫向鵝雛誇腐鼠却憐蛛隱勝眠蠶

鍾山泛宅隔秦淮歲事崢嶸且住佳父老獻鳩來畏蠶

門生載酒過蕭齋趨庭郢樹春傳信照座唐花曉揭牌

堪笑十眉圖挂壁是誰如願上花階

近作十眉圖行看子

校書小閣傍郊塵爆竹聲中坐不眠四壁藏鉤懷守歲

憶諸童孫

五更難燭記

朝天硯池曉日紅初上梨岳東風綠最先晚景飛騰兄

健在春潮生處買歸船

丙子元旦

江行雜詩疊韻四首

春光早迓秣陵船人與春爭幾日先五兩輕風開海霧

一鉤新月照江天，盆梅帶臘寒相對。岸柳含烟淡欲眠。

估客栽艸環作障，斜川勝賞羨芳廬。

正月五日
真州舟中

白下門前宅一廬，敢言歸去稱高眠。蓬萊有客行東海，
閭闔何人奏九天。風伯不因迴懼利，江神可許著鞭先。
欲尋仙掌屯田路，好問漁莊賣酒船。

真州守風

細祝東風不上船，今朝應律讓誰先。寒烟尚拂靴紋浪，
旭日微烘卵色天。春味入詩嫌獺祭，宦情如水愛鷗眠。
時和且爲農民賀，嘉穀當收三百廬。

八日立春

揚舲半日傍江廬，風阻篙工又晝眠。隔岸青山如遲客，
倚篷烏帽但窺天。老梅林下開春未，宿鷺洲邊得氣先。

宦跡重尋多阻滯
煙波合汎志和船
沙漫洲阻風